

PAGTULON-AN 21 – ANG KAHIBULONGANG PAGKAKABIG NI SAULO

Buhat 8 - 9

TEMA: Pagpakita sa tawag ni Cristo alang sa pag-alagad.

Sa dili pa kita magapadayon sa atong pagpanaw karon, mobalik kita pagtan-aw didto sa mga ESKINA SA KALIBUG. Didto sa maong panahon ang tawo misalikway sa Dios; ug busa ang Dios misalikway usab kanila, Roma 1:24-28. Unya nagpili ang Dios ug usa ka tawo, si Abram, aron sa pagsugod ug bag-o nga pagdumala sa tawo, Genesis 12:1-3. Ang tawo miliko ngadto sa DALAN SA MGA GENTIL. Si Abram lamang ang misunod sa Dios diha sa DALAN SA SAAD, Buhat 7:2-4. Kining pagtulon-an magasugod diha sa DALAN SA GINGHARIAN, ug karon atong tan-awon unsaon sa Israel pagpadayon sa pagsalikway sa tanyag sa Dios sa gingharian; ug giunsa sa Dios pagtawag ang *bag-ong* apostol, dili usa sa dose (12) ka apostoles, aron sa pagsugod ug usa ka butang nga hingpit nga bag-o alang sa mga Judio ug mga Gentil.


Sa dihang si Esteban gipanagbato, adunay usa ka tawo nga nagatindog sa duol nga nagabantay sa mga sinina sa mga naglabay ug bato. Ang ngalan sa maong tawo mao si Saulo, Buhat 7:58. Si Saulo natawo nga usa ka Hebreohanon sa tribu ni Benjamen (Filipos 3:5) and usa ka lumolupyo sa Tarsu (Buhat 9:11), ang ulohang siyudad sa Romano nga probinsiya sa Cilicia. Siya natawo nga usa Hebreohanon ug usa ka Romano. Siya gidala sa Jerusalem ug namatuto ilalum ni Gamaliel, Buhat 22:3. Siya usa ka Pariseo, anak sa mga Pariseo (Buhat 23:6) ug miuyon siya nga patyon si Esteban. Sa adlaw sa kamatayon ni Esteban, dihay dakung paglutos batok sa Iglesia sa Jerusalem; ug ang mga magtotoo mikalagiw ngadto sa kayutaan sa Judea ug Samaria, gawas sa mga apostoles. Dihay pipila ka mga matinoohon nga mga tawo nga milubong kang Esteban ug naghimo sa pagbangutan alang kaniya. Apan si Saulo misugod sa paglutos sa Iglesia, misulod sa mga balay ug miguyod sa mga lalaki ug mga babaye aron bilangoon, Buhat 8:1-3.

Apan unya, atong mabasa ang talagsaong pagkakabig ni Saulo didto sa dalan sa Damasco sa Buhat 9:1-16. Didto sa Damasco gisultihan sa Dios si Ananias: “Umadto ka kang Saulo, kay siya pinili nga galamiton Ko sa pagdala sa akong ngalan sa atubangan sa mga Gentil ug sa mga hari ug sa mga anak sa Israel; kay ipakita Ko kaniya unsa kadaghan ang kinahanglan iyang pagaantuson tungod sa akong ngalan,” Buhat 9:15-16. Busa, si Saulo gihatagan ug pinasahi nga bulohaton sa pag-antus, apan sa kaulahiay siya nagsulat nga kini usa ka pribilihiyo sa pag-antus alang kang Cristo, Filipos 1:29. Unsa man usab ikaw? Imo bang giila nga ang pag-antus alang kang Cristo usa ka pribilihiyo?

Dihadiha si Saulo misugod sa pagwali kang Cristo didto sa sinagoga sa Damasco nga nagaingon, “Siya mao ang Anak sa Dios.” Ang tanan nga nakadungog kaniya nahibulong ug

nagaingon, “Dili ba siya kadto nga didto sa Jerusalem nga naglutos sa tanan nga motawag niining maong ngalan, ug mianhi dinhi sa tuyo nga dad-on niya sila ngadto sa labawng sacerdote?” Apan si Saulo nagapadayon sa pagpakiglantugi sa mga Judio pinaagi sa pagpamatuod nga kining Jesus mao si Cristo, Buhat 9:20-22.

Ang mga dili matinoohon nga mga Judio wala modawat sa pagpanghimatuod ni Saulo. Ang Bibliya didto sa Buhat 9:23, nagaingon nga human sa “daghang mga adlaw” sila nanagsabut sa pagpatay kaniya. Ang mga pulong “daghang mga adlaw” mahimong pataason aron mahimong tulo (3) katuig diin si Saulo miadto sa Arabia. Sa maong mga katuigan siya nagadawat ug mga pinadayag gikan sa nabanhaw nga si Jesu-Cristo mahitungod sa bag-ong maayong balita nga iya unyang iwali, Galacia 1:11-17. Ang plano sa pagpatay nahibaloan ni Saulo. Bisan sila nagabantay sa mga pultahan sa siyudad sa adlaw ug gabii aron sa pagpatay kaniya, ang mga tinun-an ni Saulo mikuha kaniya sa kagabhion ug siya gipakanaug sa paril, gitunton sulod sa usa ka bukag, Buhat 9:24-25.



Tinubdan: Sweet Publishing – kini ilustrasyon lamang sa Buhat 9:24

Sa pag-abut ni Saulo sa Jerusalem, siya misulay sa pag-ipon sa mga tinun-an, apan silang tanan nangahadlok kaniya. Wala sila motoo nga siya usa na ka tinuod nga tinun-an. Apan si Bernabe, usa ka Levihanon nga taga Cipro, midala kaniya ngadto sa mga apostoles.

Sa Galacia 1:19, atong makat-unan nga ang tanang mga apostoles nanglakaw gawas kang Pedro ug Santiago nga igsoon sa Ginoo. Si Santiago dili usa sa dose (12) ka mga apostoles, apan siya adunay katungdanan didto sa Jerusalem nga matandi ngadto sa usa ka apostol. Si Bernabe nagasulti kanila nga si Saulo nakakita sa Ginoo didto sa dalan sa Damasco, ug nga ang Ginoo nakigsulti kaniya ug nga didto sa Damasco siya nagapanghimatuod sa maisugon gayud sa ngalan ni Jesus.

Didto sa dalan sa Damasco unang nakita ni Saulo ang nabanhaw nga Ginoo ug nakadungog sa mga pulong, “Saulo, Saulo, nganong ginalutos mo Ako?” Apan dili lamang nga ang Ginoo nagapadayag sa Iyang kaugalingon ngadto *kang Saulo* gikan sa langit, Siya nagapadayag sa Iyang kaugalingon *ngadto sa kalibutan* pinaagi kang Pablo, ang Romano nga ngalan ni Saulo. Sa Galacia 1:12, siya miingon nga nadawat niya ang mensahe “pinaagi sa pagpadayag ni Jesu-Cristo,” apan sa bersikulo 15 ug 16 miingon siya nga ang Dios nahimuot sa “PAGPADAYAG SA IYANG ANAK DINHI KANAKO.” Unsa nga pagpadayag ngadto sa kalibutan ug ngadto sa Israel sa dihang giluwat sa Dios si Saulo, ang Iyang mapasipalang kaaway! Iya kadtong gibuhat aron sa pagpakita nga gusto Niya ang tanan mapasig-uli, “aron Iyang mapakita ang kaluoy sa tanan,” (Roma 11:32). Ang Pinalanggang Anak gisalikway na; apan ang Dios nalangan usa sa adlaw sa paghukom ug mipadayag kang Cristo diha sa dili masukod nga grasya, pinaagi sa pagkabig sa labawng makasasala.

Karon nga si Saulo nakakita na ni Cristo ug nakatilaw sa kadagaya sa grasya, nahimo siya nga bag-o nga tawo. Bisan pa sauna ang Dios nagtan-aw na kaniya nga usa ka bag-o nga tawo, kay ang Dios wala man magatan-aw kaniya ingon nga usa ka dautan, tigpasipala ug mamumuno, apan gilantaw siya karon nga *anaa na kang Cristo*, kinsa nagpakamatay sa iyang dapit (2 Corinto 5:17). Ug dili lamang si Pablo *anaa na kang Cristo*, apan *si Cristo anaa kang Pablo*! Si Pablo miingon sa Galacia 1:15, 16: “... ang Dios... nahimuot sa PAGPADAYAG SA IYANG ANAK DINHI KANAKO.”

Si Cristo namatay makausa sa dapit ni Pablo. Karon si Pablo nagabarug sa dapit ni Cristo, nga nagahangyo sa mga makasasala nga magpasig-uli sila sa Dios. Sama sa ingon ani ang pag-sulti niya: “Si Cristo dili mahimong maania karon. Wala kamo magkinahanglan Kaniya. Apan ania ako nga puli sa Iyang dapit.” Tan-awa ang 2 Corinto 5:20: “Kami nangamuyo, TUNGOD KANG CRISTO, magpasig-uli kamo sa Dios.” Mao kini ang naa sa hunahuna ni Pablo sa dihang miingon siya, “Ginakalipay ko karon ang akong mga pag-antus tungod kaninyo, ug dinhi sa akong lawas ginapuno ko ang mga kasakit nga nakulang sa mga pag-antus ni Cristo alang sa Iyang lawas nga mao ang iglesia,” Colosas 1:24.

Ang puli nga pag-antus ni Cristo natapus na ug ang panahoon miabut na nga pagahukman na ang dautan nga kalibutan. Apan hinuon Siya misulti ngadto sa labaw nga manglulutos: “Saulo, Saulo, nganong ginalutos Mo ako?” Ug sugod sa maong panahon, si Saulo nga manglulutos nahimong si Saulo nga ginalutos; ug kini Iyang gidawat uban sa kalipay

aron sa pagpakita sa grasya sa gisalikway nga Cristo. Kini iyang gitawag nga “pag-ambit sa iyang mga kasakit” (Filipos 3:10) ug “pagpuno” sa nakulang sa mga pag-antus ni Cristo.

Si Pablo, ang bag-ong tawo diha kang Cristo, nagapahinumdom kanato sa “usa ka bag-ong tawo” nga karon gihimo sa Dios diha sa mga napasig-uli nga mga Judio ug mga Gentil, (Efeso 2:14-16). Si Pablo mao ang panig-ingnan. Sama kang Pablo, kita usab nagabarug sa atubangan sa Dios diha kang Cristo nga “hingpit diha Kaniya” (Colosas 2:10), tungod kay Siya nagpakamatay puli kanato. Ug samtang kita nagabarug sa atubangan sa Dios *diha kang Cristo*, si Cristo usab nagabarug sa atubangan sa kalibutan *alang kanato*, sa pagpangamuyo sa mga tawo “tungod kang Cristo” nga magpasig-uli sila sa Dios. Ug busa ang Dios nagapadayon sa pagpadayag sa iyang Anak ngadto sa kalibutan pinaagi sa mga makasasala nga naluwas pinaagi sa grasya.

SAG-ULOHON NGA BERSIKULO: “Busa kami mga tinugyanan nga pinadala ni Cristo, nga pinaagi kanamo ang Dios nagahimo sa iyang paghangyo kaninyo. Tungod kang Cristo, nangamuyo kami kaninyo, magpasig-uli kamo ngadto sa Dios.” 2 Corinto 5:20

PAGTULON-AN 21 – BULOHATON

Direksyon: Isulat ang hustong tubag sa mga pamahayag o pangutana.

1. Balik didto sa Tore sa Babel nga gitawag nga ESKINA SA KALIBUG didto sa atong mapa, adunay nahitabo sa mga Gentil tungod kay mirebelde sila sa Dios. Tan-awa kon unsa kini pinaagi sa pagpangita sa mga mosunod nga mga Kasulatan:

Rom. 1:24: _____

Rom. 1:26: _____

Roma 1:28: _____

2. Si Esteban nag-ingon nga ang Israel sad-an sa tulo ka mga butang, unsa kini? Buhat 7:51-52. Kamo kanunay gayud nga _____.

Ang inyong _____ nga nagpahibalo sa pag-abut sa Usa nga Matarung. Sila karon mao ang _____ ug _____ ni Cristo.

3. Ang Israel nahimong sama sa kadautan sa mga Gentil, busa ang Dios nangandam sa pagbuhat ug usa ka bag-ong butang. Ang una Niya nga lakang mao ang pagtugyan sa tanang _____ aron ang tanan Iyang _____ . Roma 11:32.

4. Ang tawo diin didto gibutang sa iyang tiilan ang mga sinina sa mga tawong mibato kang Esteban mao si _____ . Buhat 7:58.

5. Si Cristo misulti kang Ananias nga si Saulo maoy Iyang galamiton sa pagdala sa Iyang ngalan ngadto sa tulo ka grupo sa mga tawo. Hinganli sila, Buhat 9:15-16.

6. Dili lamang si Pablo anaa kang Cristo, apan si Cristo anaa kang Pablo. Si Pablo nagaingon sa Galacia 1:15,16: _____

7. Ang Dios nakigsulti kang Saulo gikan sa Langit. Giunsa Niya pagpakigsulti kanato karon nga nagakinabuhi diha sa TUGPAHANAN SA GRASYA? Roma 10:17. _____

8. Unsa man ang TINUGYANAN NGA PINADALA? Tan-awa ang pulong diha sa diksyonaryo ug isulat sa mubo lamang ang kahulogan. _____

9. Sumala sa 2 Corinto 5:20, unsa man ang ato kinahanglan buhaton? _____

10. Isulat ang 2 Corinto 5:20: _____
